

# Chantun Vad

Regiun al vest dal pajais che unescha il Giura, la Svizra Bassa e las Alps

■ Il chantun Vad è situà tranter il Lai da Geneva ed il Lai da Neuchâtel. El furma il quart grond chantun da la Svizra e cumpiglia il terz grond dumber d'abitantas ed abitants dal pajais (suenter Turitg e Berna). Il territori chantunal s'extenda dal Giura sur la part vest da la Svizra Bassa fin en las Alps. Malgrà las vastas regiuns ruralas viva la pli gronda part da la populaziun en citads ed aglomeraziuns. A Losanna, la chapitala dal Vad, vivan passà 120 000 persunas. Sco chantun il pli grond ed il pli populà occupa il Vad ina posiziun centrala entaifer la Svizra romanda. A medem temp sa distingua el tras in spiert cosmopolitic e tras sia ospitalità. 31,8 pertschient da sia populaziun èn persunas estras (situaziun dal 2012). Sco emprim chantun da la Svizra ha il Vad introduci l'onn 1959 il dretg da votar da las dunnas. E dapi l'acceptaziun d'ina nova constituziun il 2003 han er persunas da l'exteriur il dretg da votar e d'eleger sin plaun communal.



## In gir tras il Chantun

En il center ed al nord dal Vad domineschan las cuntradas ruralas; ma il Chantun cumpiglia er in'entira retscha da citads mesaunas, plirs lais ed er duas regiuns da muntogna che sa distinguan fundamentalmain ina da l'autra: las Prealps (Ormonts, Pays-d'Enhaut) ed il Giura (Vallée de Joux, regiun enturn Sainte-Croix). Il punct il pli bass dal Chantun giascha al Lai da Geneva, il punct il pli aut furma il piz da Les Diablerets (3210 m s.m.) en vischinanza dal Col du Pillon.

Cun l'università da Losanna ch'è vegnida fundada l'onn 1537 e cun la segunda scola politecnica federala porchia il Vad vastas pussaivladads da furmaziun universitara. A Losanna sa chatta en pli il Tribunal federal ed en il chastè da Prangins (en vischinanza dal cunfin genevrin) la sedia romanda dal Museum nazional svizzer.

Dapi l'onn 1915 furma la citad da Losanna la sedia dal comité internaziunal olimpic (CIO) e porta dapi l'onn 1994 il titel uffizial da «chapitala olimpica». 24 federaziuns internaziunalas e 20 organs internaziunals ch'èn colliads cun il sport èn sa domiciliads en il chantun Vad, tranter auter er l'UEFA a Nyon. A Gland, al vest dal Chantun, han er l'Unìun internaziunala per il mantegniment da la natira e da sias resursas ed il WWF lur sedias principalas.

*Sut la marella: Yverdon-les-Bains al Lai da Neuchâtel*

Ilms umans dal neoliticum postavan menhirs sin lur collinas (per part existan els anc oz). Ilms Helvets veneravan las funtaunas da zulper ed ils Romans giudevan l'aua chauda. Anc oz è la citad dad Yverdon-les-Bains enconuschenta per ses bogns e per sia bella riva al lai.

L'armada romana ha costruì l'emprim bogn termal en ses champ fortifitg. Il complex da bogns termals fitg frequentà en il 18avel tschientaner ha per temps pers si'attraktività, ma è adina puspè vegnì reconstruì. Oz è la citad loscha da ses bogns e dal Grand Hôtel des Bains, l'object da parada.

La citadina dad Yverdon-les-Bains ha deditg ina statua ed ina piazza a ses bab adoptiv Heinrich Pestalozzi, il grond protector dals paupers. Enturn questa piazza stattan perlas da temps istorics: il chastè (13avel tschientaner), la chasa-cumin e la baselgia (18avel tschientaner). Da tempra futuristica è percenter la Maison d'Ailleurs, in mu-

seum per science fiction. Tgi che ha gugent la cumpagnia va en il Théâtre de l'Echandole. La citad dumbra 24 000 abitantas ed abitants e metta l'accent sin il commerzi, l'industria e la furmaziun.

## Istorgia

Il Vad ch'è daventà l'onn 1803 in chantun da la Svizra, è sa constituì pass per pass durant il temp medieval ed ha mantegnì ils fastizs da las occupaziuns successivas tras l'Imperi roman (per exempel l'amfiteater ad Avenches), tras ils conts da la Burgogna e tras il chantun Berna.

Dapi la fundaziun dal Chantun ha la Regenza sia sedia en il Château Saint-Maire a Losanna. Il chastè è vegnì costruì dal temp medieval per l'uvestg da Losanna. Dal 16avel fin il 18avel tschientaner è il chastè stà la sedia dals Bernais durant lur occupaziun dal Vad.

*Sut la marella: Il chastè da Chillon*

Il chastè da Chillon sa chatta en in lieu strategic impurtant sper la via vers il Grond Son Bernard, da la vart dretga dal Lai da Geneva, ed è situà en la stretga natirala tranter la riva e la spunda dal Léman. El è sa sviluppà or d'ina tur residenziala da crap cun in mir da tschinta (11avel tschientaner) ed ha cuntanschì la furma odierna en il 13avel tschientaner. Durant il 14avel e 15avel tschientaner han ins fatg lavurs en l'intern e modifitgà il mir da tschinta sco er las turs da defensiu.

Il chastè stat en il lai sco in'insla; vers la riva vegn el protegì da dus mirs. Quel exteriur è anc rinforzà cun trais turs mez radundas. Ina punt da lain maina vers l'unica entrada davant ina tur cun ura ed ina tur da defensiu. Lura arriv'ins en la curt d'ina spezia da chastè avanzà. Vers vest maina ina porta en ils tschalers ed en las praschuns che sa chattan en ina lunga retscha sut il tract residenzial da la vart dal lai, mo pauc sur il nivel da l'aua.

La tur gronda da defensiu dominescha il chastè central e divide la curt en duas parts fortifitgadas separadamain. Il palaz da la vart vers il lai cuntegna sper las stanzas d'abitar er las salas represchentativas sco la sala da festa e la sala dals chevaliers, tuttas anc en il stadi original da la fin da l'epoca gotica.

## Economia

Il chantun Vad enconuscha structures ch'èn favuraivlas per l'economia. Numerusas interpresas multinaziunals han tschernì il chantun Vad per lur dimora principala. A Vevey sa chatta la sedia principala da Nestlé che furma la pli gronda interpresa industriala da la Svizra ed a medem temp il pli grond concern da victualias da tut il mund.

Istoricamain e fin al temp preschent è il Vad segnà – ensem cun las ulteriuras parts dal Giura – da l'industria d'uras. Quest'industria era sa furmada

a Geneva ed è vegnida transferida a partir dal 18avel tschientaner en regiuns pauc populadas sco la Vallée de Joux ed il Giura neuchâtélais.

*Sut la marella: Fabricaziun d'automats e da stgatlans da musica*

Il svilup da la mecanica da precisun per la fabricaziun d'automats e da stgatlans da musica è collià inseparablmain cun l'art d'urer. Lur origin è en Frantscha, nua ch'els èn vegnids svilupads a partir dal 18avel tschientaner.

En il Giura vadais è questa mecanica sa derasada a partir dal 19avel tschientaner. A Sainte-Croix è la produziun cumpletta d'automats da musica in artisanadi. Ella premetta la collavuraziun da numerusas persunas spezialisadas che sviluppan, produceschan e decorechan las singulas creaziuns.

Entant che las stgatlans da musica creeschon melodias tras la vibraziun da lamellas, permettàn ils automats da musica d'imitar in instrument cun agid d'indrizs mecanics, pneumatics u idraulics. Tuts dus sistems cumbineschan la mecanica cun aspects artistics – l'automat implitgescha la musica e viceversa. Els funcziunan per gronda part senza l'electricità. Cur che las stgatlans èn fabritgadas, ans fascineschan ellas en noss mund autamain tecnisà cun lur originalità mirvegliusa e poetica.

## Turissem

Sper il chantun Berna furma il Vad il sulet chantun da la Svizra che cumpiglia tant il Giura, la Svizra Bassa sco er las Alps. Turisticamain è il chantun repartì en las quatter regiuns «Giura», «regiuns ruralas», «citads e lai» ed «Alps». L'uschenunada Riviera vadaisa al Lai da Geneva attira spezialmain blers turists. Il turissem cumpiglia radund 8,6 procent da tut las plazzas da lavur dal Chantun.

*Sut la marella: Viadis da la Belle Époque en la regiun dal Lai da Geneva*

A la sava dal 19avel al 20avel tschientaner ha la Belle Époque purtà il triumf da la moda da viver e da l'ideologia burgaisa, quai ch'è sa manifestà er en in entusiassem creschent per viadis da divertiment. La Svizra era gia dapi la fin dal 18avel tschientaner in'impurtanta destinaziun per viadis romantics ed ha amplifitgà fermamain si'infrastructura turistica en il decurs dal 19avel tschientaner.

Las rivas dal Lai da Geneva tutgavan tar las destinaziuns da viadi preferidas. Destinaziuns fitg popularas eran er Ferney-Voltaire, il chastè Coppet, Signal de Bougy, Losanna e Clarens. Pli tard èn vegnids vitiers Montreux, Chillon e tut la cuntrada da la regiun. L'auta societad internaziunala amava da quel temp spezialmain ils Grands Hôtels en lieus sco Vevey u Montreux.

Curas d'aria frestga eran en moda ed han attratg viagiaturis en las autezzas da



La regiun dal Lavaux fa part dal Patrimoni cultural mundial da l'Unesco.

KEYSTONE

l'artg dal Giura, en il Pays-d'Enhaut ed en las Alps vallesanas. Per pudair satisfar a la dumonda creschenta duvravi dapli meds da transport. Las societads da bartgas a vapur sin il Lai da Geneva han gi in temp da prosperità a partir da l'onn 1823, pli tard lura er las viarfiers e las telefericas. Fastizs da quest progress istoric èn sa mantegnids fin oz en la bellezza da las infrastrukturas ch'èn restadas in'attracziun turistica durant ils mais da stad.

## Cultura

La purschida culturala en il chantun Vad è multinaziunala, variada e giaglia. Occurrenzas renomadas èn s'establidas gia daditg en Svizra ed a l'exteriur: il ballet Béjart a Losanna, il festival da jazz a Montreux, il Paléo Festival Nyon, il Théâtre de Vidy u l'Archiv svizzer da films a Losanna.

En il chantun Vad datti passa 80 museums communalas, chantunals u privats. Els sa deditgeschan a l'art, a las ciencias natirals, a la tecnica, a l'istorgia ed a l'archeologia u ad auters temas sco al gieu u al nutriment (Alimentarium a Vevey). A Vevey è plinavant en realisaziun in museum davart la vita ed ovra dal grond comicher ed actur Charlie Chaplin ch'ha passentà qua ils davos 25 onns da sia vita.

Il patrimoni cultural immaterial ha il chantun Vad inventarisà en furma d'ina pagina d'internet che cumpiglia actualmain 69 tradiziuns. Sper tradiziuns enconuschentas lunsch enturn – sco la Fête des Vignerons, l'inschign dals urers u ils tagls da siluetta dal Pays-d'Enhaut – cumpiglia quest inventari per exempel er il dialect dal chantun Vad, la festa da tulipanas a Morges, ils solstizs da stad da Taveyane e da Saint-Cergue, intgins vegls dretgs ruralas u las acziuns «da liberatur» dals pirats legendars dal Lai da Geneva e dals laders dal Jorat («Brigands du Jorat»).

*Sut la marella: La Festa da la vendemia a Vevey*

Mintga 20 onns sa transfurmescha Vevey en ina gigantica tribuna al liber, sin la quala vegn preschentada la passiu per il vin en la midada da las generaziuns ed en il ritmus da la vita da las vits. La Fête des Vignerons è ina festa che surpasa mintga dimensiun. Organizada vegn ella da la mastergnanza dals viticulturs ch'exista dapi il temp medieval, cur ch'ils possessurs da las vignas èn s'unids per laschar controllar la buna lavur da lur culturas.

A partir da l'onn 1772 ha decidì la mastergnanza da premiar ils megliers viticulturs. L'emprima premiazion publica – ed a medem temp l'emprima festa da la vendemia en il vair senn dal pled – ha gi lieu l'onn 1797. Sco reproducziun scenica da la tradiziun da la viticultura e da l'agricultura è la festa da la vendemia sa midada d'ina procesiun religiosa ad in festa profana da la lavur umana e da la natira fritgavla; el-

la vegn cumpletada d'allegorias pajau-nas sco er da costums e da simbols giudaic-cristians: represchentadas vegnan las stagiuns (Bacchus sco represchentant da l'atun) e las professiuns agriculas, ultra da quai creaturas da tuttas sorts sco fauns, silenias ed autsacerdots.

Dapi il 19avel tschientaner è la festa da la vendemia in spectacul enorm, al qual contribueschan poets, musicists e choreografs e ch'ha ina piazza tut speziala en ils cors dals Vadais. Durant 10 onns preparan els la festa, durant 10 onns vivan els en las regurdanzas. A l'ultima festa da la vendemia l'onn 1999 èn sa participads var 5000 acturs. La proxima festa ha lieu dals 26 da fanadur als 11 d'avust 2019.

## Natira

Il Lavaux furma ina regiun da viticultura cun terrassas pittorescas situada a la riva dal Lai da Geneva (tranter las aglomeraziuns da Losanna e da Vevey/Montreux). Grazia ad in'iniziativa dal pievel è la regiun protegida dapi il 1977 en la constituziun dal chantun Vad. Il matg 2007 è il Lavaux en pli vegnì recepì en la glista dal Patrimoni cultural mundial da l'Unesco. Ma er autras parts dal chantun Vad porschan cuntradas da bellezza, sco per exempel ils dus parcs natirals da muntada nazunala.

*Sut la marella: Ils parcs natirals*

Il Parc natiral regional Jura vaudois s'extenda dal Pass da la Givrine fin a la pitschna citad medievals da Romainmôtier, daventada famosa per si'abazia. Sias cuntradas èn ordvart variadas: guauds paschaivels alterneschan cun palids misteriusas, vastas pastgiras e grippa carstica. Il gaud da Risoud è cun sias 2277 hectaras schizun il gaud il pli grond da l'Europa. Situà sin passa 1000 meters sur mar, cumpiglia el surtut pigns che furneschan laina da fitg auta qualitat. Sco ch'i para è il lain da resonanza dal Risoud schizunt vegnì utilisà per tscherts instruments da Stradivari.

Il Parc natiral Gruyère Pays-d'Enhaut sa chatta al cunfin tranter ils chantuns Friburg e Vad. En quest parc entran l'uman, la natira e la cultura en in rapport impressionant: Las chadainas da collinas selvadias cun las stallas d'alp cuvertas cun schlondas, ils vitgs istorics e las punts da crap sur la Saane èn perditgas d'ina cultura da plirs tschientaners. La Maison de l'Etivaz, situada en vischinanza da Château-d'Éx, preschenta il parc e l'economia alpestra cun datas e facts.

### La preschentaziun:

Dossier «Chantun Vad»

### Dapli infurmaziuns:

chatta.ch/?hiid=1828  
www.chattà.ch



L'anteriura abazia da Romainmôtier.

FOTO PD